

Gesundheit!

Wenn jemand von de äldere Bekonnde odder Verwondte Geburtsdaach hott, waaß merr werklich nimmi was merr schenke soll, die Leit hawwe joo alles. Schnaps derrfesse kooner mehr drinke, Praline sollese nimmi esse, e Buch hawwese schunn, Porzellan brauches koons mehr, Nippes ferr in de Schronk ze stelle schenke se weider - also was macht merr? Merr schenkt enn Gutschoi.

Awwer wasferrn - holle merr ooner von de Fußpfleech oder von de Abbedek, vom Blummelade odder von de Parfümerie? Doo isses immer om beste, merr frägt jemand von de Verwondschaft. Unn trotzdem konnders bassiern, das die oder der Glückliche dich beim Auspacke von dem Gutschoi zimlich gequält oolächelt.

Odder, wenn merr enn Gutschoi vonere Wertschaft schenkt, heert merr später, dass der iwwer 30 Euro nit gelangt hott, dass 45 ausgewwe hawwe unn dasses noch nit emol geschmeckt hott.

Bei de Freunde hadde merrs vorsjohr deshalb onnerst gemacht: Mir hawwe uns geecheseidich e Flasch Woi geschenkt unn hawwese om selbe Owend noch sesomme ausgedrunke. Awwer weil merr joo enn Woi metnimmt, der oom selber schmeckt, hawwe die Beschenkte monchmol e sauer Gesicht gemacht, merr musst schließlich die Flasch alloo ausdrinke unn dess iss joo aach nit schee.

On Neijohr hawwe merr desdeweche ausgemacht, mir wolle uns in Zukunft nix mehr schenke außer em Händedruck unn em Küssje ferr e Fraa unn em Schlaach uff die Schulter ferr en Monn unn doozu saache merr: Ich wünsch derr alles Gute unn vor allem Gesundheit. Dess kost nix, kommt immer gut oo unn jeder kann sich preiswert revanchiern. Unn de Wunsch nooch Gesundheit iss doch nit ze iwwertreffe, odder?

Seit korzem bin ich allerdings om Noochdenke, ob merr iwwer dess Gesundheit wünsche noch emol redde solle. Unn alles, weil ich vor e paar Daach de Hubert getroffe habb.

Mensch, Hubert, habb ich gesacht, dich habb ich joo schunn seit Weihnachte nimmi geseh, also Prost Neijohr unn vor allem: Gesundheit!

Hör' doch auf, sacht de Hubert, von dir, mein lieber Hannes, hätte ich eigentlich etwas anderes erwartet als diesen abgegriffenen, gedankenlosen Wunsch nach Gesundheit.

Ei – ei - Hubert, habb ich gestottert, was soll ich derr dann Besseres wünsche als Gesundheit?

Nein, moont de Hubert, denn Gesundheit ist nicht alles: Die mit der Titanic untergegangen sind, die waren alle gesund. Nein, wünsch' mir Glück – und wenn ich Glück habe, bleibe ich gesund, gewinne im Lotto und meine Frau behält ihren Arbeitsplatz.

Ich war immer noch so verdattert, dass ich sogar Hochdeutsch gebabbelt habb: Ja, also Hubert, dann wünsche ich dir viel Glück im neuen Jahr.

Siehst du, lächelt de Hubert, das hört sich schon besser an. Und nun tschüss, ich muss zum Arzt.

Gleich habb ich die Sprooch widdergefunne unn habbem hin-nenooch gerufe: Viel Glück, awwer hosde aach zeh Euro debei?

Eiern Honnes